

L'emprova da pudair vesair tut

Panoramas dissegnads èn dapli che fotos - tuttina èn els bunamain ids en emblidanza

■ (anr/vi) I sa tracta era da panoramas da culms svizzers. Igl è da vesair bellezza vistas sin il Tödi u sin l'Eiger, Mönch e Jungfrau. Tuttina n'ha l'exposiziun dals panoramas en las Alps betg lieu en noss pajais, mabain a Minca, Innsbruck e Balsaun. Pudair vesair tut, quest giavisch avevan ils carstgauns già cura ch'i na deva anc nagina televisiun e naginas fotografias. En il 19avel tschientaner han ins cumenzà ad ir per la pizza. L'interess per las Alps è creschì. Era la gliעד, che na pudeva betg ir a culm, leva savair co quai vesa ora sin in piz. Uschia èn ils panoramas dissegnads vegnids en moda. Las cartas han per part ina lunghezza considerabla. Ils originals mesiran magari schizunt plirs meters. Stampà han ins tals panoramas sin cartas lungas ch'ins ha lura faldà. Ils clubs alpini da l'Austria, da la Germania e da la Svizra han per part derasà las cartas sco aschuntas tar lur publicaziuns. Las ediziuns dals panoramas èn vegnidas pli e pli grondas: Il 1872 stampavan ins be 4000 exemplars. Il 1908 cumportava in'ediziun già 78 000 tocs. Suentar ha la fotografia stgatschà ils panoramas dissegnads

Deplorablmain betg en Svizra

Da preschent mussa in'exposiziun a Minca questas ovras artisticas. Ellas èn bunamain idas en emblidanza en ils tschalers. Da tscherts panoramas èsi difficil d'insumma chattar stampats. L'exposiziun sa numna «Rundum Berge. Faltpanorama oder der Versuch alles sehen zu können». Ella mussa raround tschuncanta panoramas. Fitgblers da quels èn panoramas svizzers.

Questa primavaira è l'exposiziun stada da vesair ad Innsbruck. Là è ella era vegnida concepida dal «Alpenvereinsmuseum». Uss pon ins contemplar las cartas en il «Alpines Museum» a Minca. Il 2002 surpiglia il «Südtiroler Alpenverein» ils dissegn ed expone els a Balsaun. In'exposiziun en Svizra n'è para betg planisada.

Dapli ch'ina fotografia


Ils panoramas fascineschan en plirs regards. Els resplendan il svilup da l'alpinissem en ses emprim stadi dal 19avel tschientaner. Ins intervegn era bler da l'istorgia dals clubs alpini. Sper l'aspect artistic gioga sa chapescha l'aspect infurmativ la pli gronda rolla.

Qua sa mussa era las qualitads dals panoramas. Entant che las fotografias reproduceschan be la vista, porschan



Albert Heim, il retg dals panoramas, ha dissegnà il Tödi dal Pass Sandalp anora. (publitgà en l'annala 1877 dal Club alpin svizzer)

FOTOS MAD



Panorama dal Faulhorn en il Berner Oberland.



Sulzfluh e Drusenfluh (Rätikon). J. Müller-Wegmann.

ils panoramas era accents. Ed in piz allontanà, che svanescha sin ina fotografia, po en in dissegn vegnir accentuà.

Mintga dissegnader aveva sias preferenzas u talents singulars. Perquai è mintga panorama in maletg per sasez. Lura stuevan ils dissegnaders per part dar suatientscha als giavischs da lur client. Tut tenor aveva lez betg mo interess geografics, mabain era geologic. Tscherts clients levàn in panorama cun detagls davart fauna e flora. Uschia datti panoramas che mussan minuziusamain ils detagls geologic. Auters descrivan cun exactadad penibla mintga ruta da viagnar. Puspè auters s'occupeschan be dals piz enconuschents entant ch'ils nunenconuschents vegnan skizzads be schematicamain.

Strapatschadas

Albert Heim (1849-1937) è stà geolog ed in reconuschì dissegnader da panoramas. El scriva da sia lavur: «Sch'igl è spezialmain cler per disse-

gnar sin l'auta pizza, lura va savens in vent criv, l'entir corp vegn tut steric da la schelira, ins vul dentant nizzagiari la buna glisch e disegna uras ora cun detta sterica, ch'ins na senta strusch pli il rispli enta maun. Senza quai na sa splega per ordinari nagina registraziun d'in panorama d'in piz che varga en las regiuns da naiv.» Perquai ha era Albert Bosshard stuvì ceder. El aveva survegnì l'incumbensa dal Club alpin svizzer da dissegnar in panorama dal Tödi. Entaifer otg onns, enfin il 1914, è el ì ver tschuncanta giadas a munt. El ha vulì far in panorama en dudesch parts ed aveva las ambiziuns dissegnar minuziusamain mintga detagl en ina precisiun artistica mai s'udida. El n'è betg vegnì a fin cun sia ovra. Quatter dissegn da la lavur da Bosshard pon ins admirar oz en il «Alpines Museum» a Minca.

«Rundum Berge» è da vesair enfin ils 28 d'october en il Alpines Museum, Praterinsel 5, D-80538 Minca. Il 2002 vegnan ils dissegn exponids en il Tiroi dal sid a Balsaun.